

廿二史考異

遼史

廿二史攷異八十三

錢大昕學

太祖紀

元年四月丁未朔唐梁王朱全忠廢其主尋弑之 按
五代史梁主卽位在四月甲子其明年正月弑濟陰
王此繫之四月朔非也

六年四月梁郢王友珪弑父自立 五代史在六月
神冊元年四月乙酉朔晉幽州節度使盧國用來降以
爲幽州兵馬留後 按五代史盧文進字大用疑卽
紀所云盧國用也而次年二月復書晉新州裨將盧

攷異

遼史八十三

十

文進殺節度使李存矩來降疑是一事而重出也且是時周德威爲幽州節度使無緣更有盧國用其人者蓋因契丹置盧龍軍于平州以文進爲節度使遂誤以契丹所授之官爲唐官耳

十一月攻蔚新武嬀儒五州自代北至河曲踰陰山盡有其地遂改武州爲歸化州嬀州爲可汗州 按地理志歸化州本漢下洛縣元魏改文德縣唐升武州晉高祖割獻于遼改今名太宗紀亦云會同元年改武州爲歸化州正在石晉賂地之後此紀所書恐非其實又地志可汗州下云五代時奚王去諸以數千

帳欲

欲字誤

媯州自別爲西奚號可汗州太祖因之此與太祖紀似合然太祖攻蔚新武媯儒五州得而旋失其改名可汗亦當在石晉賂地之後也

三年十二月以于越曷魯弟汗里軫爲迭烈部夷离堇
按耶律覲烈傳覲烈字兀里軫此作汗里軫音之
譌也紀于是年及五年書汗里軫于天贊二年書迭
刺部夷离堇覲烈一稱其字一稱其名

天顯元年四月郭存謙弒其主存勗 存謙當作從謙
十月盧龍軍節度使盧國用叛奔于唐 按五代史明
宗卽位文進自平州率衆數萬歸唐卽其事也以是

證之則神冊元年之盧國用與二年之盧文進其爲一人無疑

太宗紀

天顯三年四月鐵刺敗唐將王晏球于定州 鐵刺五代史作禿餒譯音之轉

十二年三月晉天雄軍節度使范延廣 卽范延光也 避遼諱改之

會同元年七月遣中臺省右相耶律述蘭迭烈哥使晉 按逆臣傳牒蠟字述蘭天顯中爲中臺省右相會同二年與趙思溫持節冊晉帝卽其事也迭烈哥卽

牒蠟之轉聲紀在會同元年而傳云二年此傳之譌
大同元年二月丁巳朔建國號大遼大赦改元大同
案五代史改晉國爲大遼國開運四年爲會同十年
不載大同之號

四月降重貴爲崇祿大夫 崇祿卽光祿也避遼諱改
名

穆宗紀

諱璟小字述律 按李燾長編開寶二年契丹主明爲
帳下所弑卽穆宗也當是後周避庠諱更改宋史臣
因之耳

應歷十八年七月辛丑漢主承鈞殂子繼元立 按承鈞殂而繼恩嗣立立六十日而繼元代之則九月事也此記誤

景宗紀

小字明展 長編作明記

聖宗紀

統和元年 按遼自太宗建國號大遼至聖宗統和元年去遼號仍稱大契丹道宗咸雍二年復稱大遼遼史皆沒而不書

長編契丹主明記卒隆緒繼立改大遼爲大契丹

四年九月辛巳納皇后蕭氏 按統和十九年三月皇

后蕭氏以罪降爲貴妃其五月冊蕭氏爲齊天皇后
紀不言復立而仁德皇后傳亦無中廢之文其非一
人可知后妃傳不載蓋史闕文也至開泰六年六月
德妃蕭氏賜死其卽廢后與否史無明文以知之矣
五年四月丁酉上率百僚冊上皇太后尊號曰睿德神
略應運啟化承天皇太后禮畢羣臣上皇帝尊號曰
至德廣孝昭聖天輔皇帝 按本紀二十四年十月
上皇太后皇帝尊號與此無一字異者若非重出則
彼文有遺脫也后妃傳止有二十四年加上尊號別
無五年加尊之文

十八年十一月授西平王李繼遷子德昭 宋史作德明

二十二年十一月次澶淵蕭撻凜中伏弩死 宋史作撻覽覽凜聲相近也統和四年有彰德軍節度使蕭闡覽六年有太師闡覽與此本一人而前後譯字互異

道宗紀

清寧六年五月監修國史耶律白請編次御製詩賦仍命白爲序咸雍六年六月以惕隱耶律白爲中京留守八月耶律白薨追封遼西郡王 按此三事俱見

耶律良傳紀與傳當有一誤或一人而二名也

大安九年十月宋遣使告其母后曹氏哀 按是歲宋元祐八年太皇太后高氏崩非曹氏也

壽隆元年 按洪遵泉志載壽昌元寶錢引李季興東北諸蕃脛要云契丹主天祐年號壽昌又引北遼通書云天祚卽位壽昌七年改元乾統予家藏易州興國寺碑安德州靈巖寺碑興中府玉石觀音像唱和詩碑皆壽昌中刻東都事略文獻通攷皆宋人書也亦稱壽昌無有云壽隆者可證壽隆乃壽昌之譌也遼人謹於避諱如光祿改爲崇祿避太宗諱也文真

改爲女直避興宗諱也天祚名延禧乃追改重熙年號爲重和於嫌名猶必回避如此道宗乃聖宗之孫而以壽隆紀年此理所必無者

天祚帝紀

保大三年四月金兵至居庸關擒耶律大石九月耶律大石自金來歸四年七月天祚旣得林牙耶律大石兵歸又得陰山室韋謨葛失兵自謂得天助再謀出兵復收燕雲大石林牙力諫不從大石遂殺乙薛及坡里括置北南面官屬自立爲王率所部西去 按紀末敘大石事云金兵至蕭德妃歸天祚天祚誅德

妃責大石曰我在汝何敢立淳對曰云云上無以荅
賜酒食赦其罪大石不自安遂殺蕭乙薛坡里括自
立爲王率鐵騎二百宵遁西至可敦城駐北庭都護
府得精兵萬餘明年二月甲午以青牛白馬祭天地
祖宗整旅而西先遺書回鶻王畢勒哥假道畢勒哥
得書卽迎至邸大安三日臨行獻馬駝羊送至境外
所過敵者勝之降者安之兵行萬里歸者數國軍氛
日盛至尋思干西域諸國舉兵十萬號忽兒珊來拒
戰三軍俱進忽兒珊大敗駐軍尋思干凡九十日回
回國王來降又西至起兒漫文武百官冊立爲帝以

甲辰歲二月五日卽位攻天祚誅德妃在保大三年
歲在癸卯其明年卽是甲辰歲大石以二月整旅而
西兵行萬里時口已久駐軍尋思干又九十日然後
西行至起兒漫當已踰年矣乃云以甲辰歲二月五
日卽位何其謬耶若據此紀之文則大石以甲辰歲
七月始率所部西去較紀末所書又差一年傳聞之
互異如此

兵衛志

永昌宮正丁一萬四千 按營衛志載各宮正戶轉戶
之數兵衛志載正丁轉丁之數丁數常倍于戶數是

一戶出二丁也獨永昌宮彼志云正戶八千此云正丁一萬四千當有一誤

地理志

太宗立晉有幽涿檀薊順營平蔚朔雲應新媯儒武寰十六州按太宗紀會同元年十一月晉遣趙瑩奉表來賀以幽薊瀛莫涿檀順媯儒新武雲應朔寰蔚十六州并圖籍來獻有瀛莫無營平此志平州下云太祖天贊二年取之營州下云太祖以居定州俘戶是營平非石晉所賂明矣瀛莫二州得而旋失

後周顯德

六年取瀛州莫州即遼應歷九年

而營平元係唐故地後人因以當

十六州之數志謂營平亦太宗立晉所得蓋相沿之

遼分薊之遵化縣爲景州而易州則聖宗統和七年侵宋所得遼史南京析津府統州六謂順檀承易薊景也宋徽宗宣和五年四月金人來歸燕京六州亦卽此

龍化州太祖於此建東樓天顯元年崩于東樓 按太

祖紀太祖所崩行宮在扶餘城西南兩河之間後建

昇天殿于此而以扶餘爲黃龍府此志於龍州黃龍

府亦云太祖平渤海還至此崩此乃云崩于東樓誤

矣

北安州興化軍領縣一利民縣 按金史地理志興州

本遼北安州興化軍興化縣承安五年陞爲興州領

興化宜興二縣興化爲倚郭遼舊縣又有利民縣承安五年以利民寨升泰和四年廢蓋遼之北安州有興化縣無利民縣惟金承安中嘗升利民寨爲縣未久旋廢作遼史者乃以金所置之利民爲遼時舊縣而不及興化誤矣

建州漢乾祐元年 按乾祐元年遼世宗天祿二年也
史當書遼年號

隰州平海軍統縣一海陽縣 按金史地理志北京路瑞州有海陽縣遼潤州海陽軍故縣也有海濱縣遼隰州平海軍故縣也遼志則云隰州平海軍統海陽

縣潤州海陽軍統海濱縣與彼志互異攷海陽軍名與縣名相符當以金志爲正

三河縣本漢臨朐縣地 朐當作洵字之譌也兩漢志俱無臨洵縣唐武德二年析潞縣置臨洵貞觀元年省開元四年復析潞縣置三河縣蓋卽臨洵故地臨洵唐縣非漢縣明矣明一統志又承遼志之誤

歸化州元魏文德縣唐升武州僖宗改毅州後唐太祖復武州明宗又爲毅州潞王仍爲武州晉高祖割獻於遼改今名 按本卷武州下云魏置神武縣唐末置武州唐改毅州重熙九年復武州此兩武州當有

一誤

歷象志

司天監馬續奏上乙未元歷 五代史作馬重績蓋避
晉出帝諱去上一字

大明歷本宋祖沖之法具見沈約宋書 祖沖之歷已
見前史而此志全錄之蓋作史者徒求卷帙之富於
史例無當也

百官志

遙輦侍中一作世燭 世燭與侍中聲相近蓋取漢人
侍中之名譯音轉訛爾此如常袞一作敝穩又作詳

穩其實乃襲用漢人相公之稱因音譌而異其文也

聖宗統和十二年命室昉爲中京留守治大定府 按

遼有兩中京一爲鎮州一爲大定府鎮州自太宗北

還其地仍八中國遼史所稱中京皆大定府也

惟趙延壽

耶律拔里得傳之中京乃是鎮州地理志統和二十四年五帳院進

故奚王牙帳地

聖宗紀奚王府五帳六節度獻七金山上河川在統和二十年與志不同

二十五年城之實以漢戶號曰中京府曰大定是則

中京之名始于統和二十五年不應昉先得爲留守

昉昉本傳稱保寧間改南京副留守遷工部尙書改

樞密副使參知政事統和八年請致政詔入朝免拜

賜几杖太后遣閣門使李從訓持詔勞問令常居南京封鄴國公病劇遣翰林學士張幹就第授中京留守加尙父竊疑中京本南京之譌志云治大定者史家不知而附益之耳

禮志

二月八日爲悉達太子生辰

按二月當爲四月

葉隆禮葬

丹國志本作四月八日

志載此條于二月一日之後三月三日

之前則史文固然非轉寫之誤金史海陵紀正隆元年禁二月八日迎佛亦一證

皇子表

功罪 按義宗章肅皇帝順宗逆臣重元諸傳與此表所述功罪略同此史文之重複也

皇族表

于越注于越休哥 按列傳注與休哥皆南院夷酋董

綰思之子表於上一格失書綰思名似與痕只皆滑

哥之子矣釋魯庶子又有海思表亦失載

皇子表釋魯子亦止

載滑哥

一人

義宗傳

小字圖欲 五代史作突欲突圖聲相近

晉王敖盧斡傳

保大元年南軍都統耶律余覲與其母文妃密謀立之事覺余覲降金文妃伏誅赦盧幹實不與謀免皇子表與傳同按天祚紀蕭奉先耶律余覲傳俱稱奉先諷人誣余覲結駙馬蕭昱等謀立晉王此傳與皇子表則云余覲與文妃密謀蓋据誣告之詞而不知其自相矛盾也

耶律覲烈傳

六院部蒲古魯萬堇之後父偶思亦爲夷萬堇按

覲烈爲子越曷魯之弟乃皇族表有曷魯無覲烈又

曷魯傳云祖匣馬葛簡憲皇帝兄

皇族表作父偶思簡獻皇帝

遙輦時爲本部夷离堇旣偶思之名同則匣馬葛與
 蒲古只當卽一人矣乃史於耶律鐸臻耶律渥里思
 耶律吼耶律勃古哲耶律裏履耶律合里只耶律那
 也耶律牒臘傳並云六院夷离堇蒲古只之後而皇
 族表皆不列其名何也皇子表稱懿祖第二子帖刺
 九任迭刺部夷离堇故六院司呼爲夷离堇房而簡
 獻皇帝爲懿祖第三子則帖刺正簡獻之兄與匣馬
 葛非兩人矣而皇族表又岐而二之何也遼史雜采
 它書往往自相矛盾予以紀表志傳參而攷之則帖
 刺也蒲古只也匣馬葛也蓋一人而三名也

耶律拔里得傳

耶律拔里得字孩鄰 五代史所稱麻荅卽其人也

耶律安搏傳

祖楚不魯父迭里 按皇族表以安搏爲楚不魯之子
誤也傳稱安搏姪撒給左皮室詳穩表以撒給與安
搏爲兄弟行亦誤

蕭陽阿傳

父卒 按陽阿爲蕭樂音奴之子樂音奴在列傳第二
十六卷而陽阿在列傳第十二卷是子先於父也且
此卷內耶律隆運耶律勃古哲武白蕭常哥耶律虎

古五人皆顯于統和間獨陽阿以天祚時人廁其間
亦失倫也

耶律僕里篤傳

太平中累遷彰聖軍節度使十六年知興中府 按太
平紀元終于十一年此後惟重熙紀元乃有二十四
年且興中府初爲霸州至重熙十年始升爲府安得
于太平中有知興中府者此爲重熙之十六年無疑
矣史脫重熙二字

蕭韓家奴傳

重熙十三年春上䟽言累聖相承自夷離堇湖烈以下

大號未加天皇帝之考夷离堇的魯猶以名呼臣以爲宜依唐典追崇四祖爲皇帝 按太祖紀雅里生毗牒毗牒生頽領頽領生耨里思是爲肅祖肅祖生薩剌德是爲懿祖懿祖生勻德實是爲元祖元祖生撒剌的是爲德祖卽太祖之父也與傳所稱不同意紀所稱者其名而傳所舉者其號乎地理志遼國五代祖勃突生于勃突山因以名太祖紀亦不見勃突名

宋奉使諸臣年表

開寶八年

遼保寧七年

七月丙上閣門使郝崇信太常丞呂

端使契丹

是年三月契丹始遣使來聘

十一月校書郎直史館

宋準殿直邢文度

宋史作文度

充契丹賀正旦使

九年

遼保寧八年

五月東上閣門副使田守奇右贊善大夫

房彥均充賀契丹生辰使

十一月著作郎馮正著

作佐郎張玘使契丹告哀

太平興國二年

遼保寧九年

五月起居舍人辛仲甫右贊善

大夫穆被使契丹賀生辰

十一月監察御史李漬

閣門祇候鄭偉賀契丹正旦

三年

遼保寧十年

五月左補闕李吉通事舍人薛文寶賀契

丹生辰

十一月供奉官閤門祇候吳元載太常寺

太祝母賓古賀契丹正旦

其明年太宗親征幽州不克南北不通使者二十五

年

景德元年

遼統和廿二年

十月閤門祇候假崇儀副使曹利用

使契丹

十一月利用再使契丹又遣西京左藏庫

使樊州刺史李繼昌持誓書報聘

二年

遼統和廿三年

二月開封府推官太子中允直集賢院孫

僅右侍禁閤門祇候康宗元賀國母生辰 十月度

支判官太常博士周漸侍禁閤門祇候郭盛賀國主

生辰職方郎中直史館韓國華衣庫副使通事舍人
焦守節賀國母正旦鹽鐵判官祕書丞張若谷內殿
崇班閣門祇候郭允恭賀國主正旦

三年

遼統和
廿四年

三月兵部員外郎直史館任中正西上閣

門使樊州刺史李繼昌賀國母生辰 十月太常博

士王曙內殿崇班閣門祇候高維忠賀國主生辰戶
部員外郎直集賢院李維崇儀使雅州刺史張利涉
賀國母正旦太常博士段暉如京副使孫正辭賀國
主正旦

四年

遼統和
廿五年

三月戶部副使水部員外郎崔端侍禁閣

門祇候張利用賀國母生辰 九月戶部副使祠部
郎中宋搏供奉官閤門祇候馮若拙賀國母正旦著
作郎直史館陳知微供奉官閤門祇候王承俱賀國
主正旦戶部判官殿中丞滕涉侍禁閤門祇候劉煦
賀國主生辰

大中祥符元年遼統和廿六年三月都官員外郎喬希顏供奉

官閤門祇候景元賀國母生辰 九月御史馬亮西

京作坊使魏昭易賀國母正旦都官員外郎孫奭侍

禁閤門祇候薛貽廓賀國主正旦

是歲賀國主生辰
使副長編失書

二年

遼統和廿七年

二月太常博士直史館王隨供奉官閤門

祇候王承瑾賀國母生辰 九月工部侍郎馮起南
作坊使李繼源賀國母正旦殿中侍御史趙禎六宅
使嘉州團練使杜守元賀國主正旦太常博士直史
館樂黃目東染院使潯州刺史潘惟吉賀國主生辰
十二月以契丹國母殂遣太常博士直史館王隨
內殿承制閣門祇候郭允恭爲祭奠使太常博士判
三司催欠憑由司王曙供奉官閣門祇候王承瑾爲
弔慰使

三年

遼統和
廿八年

十月右司諫直史館李廸六宅使合州團

練使白守素賀國主生辰監察御史乞伏矩供奉官

閤門祇候翟繼思賀正旦既而守素不行以內園副使崔可道代之

四年

遼統和九年

九月工部郎中龍圖閣待制張知白崇儀

副使薛惟正賀國主生辰兵部員外郎兼侍御史知

雜事趙湘供奉官閤門祇候符承翰賀正旦

五年

遼開泰元年

十月主客郎中知制誥王曾官苑使榮州

刺史高繼勲賀國主生辰屯田郎中兼侍御史知雜

事李士龍內殿崇班閤門祇候李餘懿賀正旦

六年

遼開泰二年

九月翰林學士晁迥崇儀副使王希範賀

國主生辰龍圖閣待制查道供奉官閤門祇候蔚信

賀正旦

七年

遼開泰三年

九月殿中侍御史周寶西京作坊副使段

守倫賀國主生辰屯田員外郎趙世長內殿崇班閤

門祇候張舜臣賀正旦

八年

遼開泰四年

九月左司諫知制誥劉筠供奉官閤門祇

候宋德文賀國主生辰戶部副使吏部員外郎李及

侍禁閤門祇候李居中賀正旦

九年

遼開泰五年

九月樞密直學士工部侍郎薛映東染院

使劉承宗賀國主生辰壽春郡王友戶部郎中直昭

文館張士遜供備庫使王承德賀正旦

天禧元年

遼開泰六年

九月兵部員外郎龍圖閣待制李行

簡左騏驎使宜州刺史張佖賀國主生辰太子中允

直龍圖閣馮元內殿閣門祇候張綸賀正旦

二年

遼開泰七年

九月起居舍人呂夷簡供奉官閣門祇候

曹琮賀國主生辰工部郎中直史館陳堯佐侍禁閣

門祇候張君平賀正旦

三年

遼開泰八年

九月吏部郎中直史館兼太子左諭德崔

遵度西京左藏庫使王應昌賀國主生辰三司鹽鐵

判官監察御史劉平供奉官閣門祇候張元普賀正

旦

四年遼開泰九年九月知制誥宋綬閣門祇候譚倫遼史作

賀國主生辰太子左諭德魯宗道閣門祇候成吉賀

正旦

五年遼太平元年九月翰林學士李諮遼史作內殿崇班王

仲寶遼史作賀國主生辰太常博士蘇耆侍禁閣門

祇候周鼎賀正旦耆以母喪不行改命兵部員外郎

蘇維甫

乾興元年遼太平二年二月真宗崩遣內殿承制閣門祇候

薛貽廓為契丹告哀使禮部郎中薛田遼史作供備庫

副使李餘懿為遺留禮信使四月兵部員外郎判

鹽鐵勾院任中行崇儀副使曹珣爲告卽位使 七
月戶部郎中直史館劉鍇客省副使曹儀爲皇太后
回謝使工部郎中趙賀內殿承制閤門祇候楊承吉
爲皇帝回謝使 八月禮部郎中知制誥張師德西
京左藏庫副使趙忠輔賀契丹后生辰契丹后生辰遣使始此
吏部員外郎劉曄西京作坊副使郭志言賀國主生
辰屯田員外郎王巖西頭供奉官閤門祇候劉懷德
賀正旦

天聖元年

遼太平三年

六月龍圖閣待制知開封府薛奎西

上閤門使郭盛賀國后生辰 九月度支副使戶部

員外郎王臻內殿承制閣門祇候慕容惟素賀國主
生辰權戶部判官太常博士直集賢院同修起居注
程琳右侍禁閣門祇候丁保衡賀正旦

二年

遼太平四年

七月刑部郎中直史館章得象供奉官閣

門祇候馮克忠賀國后生辰

初命刑部郎中李若谷
閣門祇候范守慶以拜

辭日不俟垂簾請對忤
太后因令二人代之

九月度支副使禮部員外

郎蔡齊供奉官閣門祇候李用和賀國主生辰鹽鐵
判官兵部員外郎張傳供奉官閣門祇候張士禹賀

正旦

三年

遼太平五年

七月翰林學士承旨李維莊宅副使張倫

賀國后生辰 九月工部郎中龍圖閣待制馬宗元

遼史作馮元宗誤初命戶部郎中知制誥夏竦竦辭以宗元代內殿承制閣門祇候

史方賀國主生辰度支副使兵部郎中姜遵內殿承

制閣門祇候許懷信賀國主正旦右正言直史館張

觀東頭供奉官閣門祇候趙應賀國后正旦賀后正旦始此

四年遼太平六年七月工部郎中龍圖閣待制韓億以名犯北朝諱

權改名意遼史作異恐誤崇儀副使田承說賀國后生辰 九月

右諫議大夫權三司使范雍東染院使帶御器械侯

繼隆賀國主生辰起居郎知制誥徐奭供奉官閣門

祇候裴繼已賀國主正旦淮南江浙荆湖制置發運

使刑部郎中張若谷右侍禁閤門祇候崔準賀國后

正旦

五年

遼太平七年

八月戶部副使兵部員外郎王博文六宅

使王準

遼史準作雙

賀國后生辰

九月吏部郎中知制

誥石中立崇儀使石貽孫賀國主生辰戶部判官職

方員外郎張寶雍

遼史作保雍

崇儀副使孫繼鄴

遼史賀作業

國主正旦左正言直史館孔道輔左侍禁閤門祇候

馬崇

遼史崇下多至字

賀國后正旦

六年

遼太平八年

七月度支副使工部郎中唐肅內殿承制

閤門祇候葛懷敏賀國后生辰

八月樞密直學士

給事中寇瑊內殿從班閤門祇候康德輿

遼史脫輿字賀

國主生辰殿中侍御史判三司開拆司朱諫供奉官

閤門祇候曹榮

改名英

賀國主正旦開封府判官殿中

侍御史張逸左侍禁閤門祇候劉永釗賀國后正旦

七年

遼太平九年

七月刑部郎中狄業作坊使陳宗憲賀國

后生辰

八月禮部員外郎兼侍御史知雜事鞠詠

供奉官閤門祇候王永錫賀國主生辰職方員外郎

判三司理欠司張羣如京副使石元孫賀國主正旦

戶部判官度支員外郎蘇耆內殿承制閤門祇候王

德賀國后生辰

八年

遼太平十年

七月鹽鐵判官兵部員外郎直史館張宗

象香藥庫使李渭賀國后生辰

八月工部郎中龍

圖閣待制梅詢供備庫副使王令傑賀國主生辰度

支員外郎祕閣校理戶部勾院王夷簡西染院使竇

處約賀國主正旦開封府判官侍御史張億

遼史億作易蓋

遼史禮賓副使張士宣

遼史宣作宜

賀國后正旦

九年

遼太平十一年

六月遼聖宗殂遣御史中丞王隨西上問

門使曹儀爲祭奠使龍圖閣待制孔道輔崇儀副使

孫繼鄴

遼史作業

爲賀登位使龍圖閣待制梅詢昭州刺

史張綸爲國母弔慰使鹽鐵副使司封員外郎王巖

內殿承制閤門祇候許懷信爲國主弔慰使 七月

改命樞密直學士寇瑊爲賀登位使孔道輔及西染

院使魏昭文爲國母冊禮使冊禮使始此瑊病不能行改

命天章閣待制范諷 十月度支員外郎知制誥鄭

向供備庫使郭遵範賀國主生辰淮南江浙荆湖制

置發運使祠部郎中任布左藏庫副使王遵範賀國

母正旦度支判官殿中侍御史陳瑋西染院副使王

克忠遼史忠作善賀國主正旦

明道元年遼重熙元年八月鹽鐵副使刑部員外郎劉隨內

殿承制閤門祇候王德基遼史基作本賀國母生辰開封

府判官職方員外郎楊日嚴客省副使王克基

遼史基作

纂

賀國主生辰太常博士直集賢院同修起居注胥

偃閣門宣事舍人王從益賀國母正旦監察御史崔

暨內殿崇班閣門祇候張懷志

初命東染院副使趙振等以懷志代之

賀國主正旦

二年

遼重熙二年

三月皇太后崩四月遣東上閣門使曹琮

爲告哀使翰林學士章得象崇儀使安繼昌爲遺留

國信使

八月度支判官刑部郎中劉寶

遼史寶西

染院副使符惟忠

遼史脫惟字

爲謝國母弔慰使度支判

官司封員外郎李昭述東染院副使張茂實爲謝國

主弔慰使兵部員外郎知制誥丁度右驎驥使王繼

凝賀國母生辰度支副使兵部員外郎李紘禮賓副

使李繼一賀國主生辰度支判官刑部郎中章頻禮

賓副使李遵懿

遼史無遵字

賀國母正旦開封府推官金

部員外郎王仲睦

遼史作仲睦

供奉官閣門祇候郭崇賀

國主正旦崇留不行以供備庫副使張瑋

遼史作緯

代之

景祐元年

遼重熙三年

八月度支員外郎直集賢院謝絳內

殿承制閣門祇候李守忠賀國主生辰度支判官刑

部員外郎直集賢院段少連供奉官閣門祇候杜贊

遼史作杜仁贊

賀國主正旦

是歲罷國母生辰正旦遣使

十月謝絳以

父疾辭以戶部員外郎兼侍御史知雜事楊偕代之

二年

遼重熙四年

八月鹽鐵判官度支郎楊日華禮賓副使

張士禹賀國主生辰太常博士直史館修起居注鄭

戢供奉官閤門祇候柴貽範賀正旦

三年

遼重熙五年

八月左正言知制誥史館修撰宋祁

遼史祁作

郊禮賓副使王世文賀國主生辰工部郎中判戶部

勾院李宗詠供奉官閤門祇候岸準賀正旦

四年

遼重熙六年

八月兵部員外郎知制誥謝絳供備庫使

連州刺史帶御器械張茂實賀國主生辰起居舍人

直史館知諫院高若訥西京左藏庫使兼閤門通事

舍人夏元正賀正旦

寶元元年

遼重熙七年

八月工部郎中知制誥王舉正禮賓

副使張士禹賀國主生辰右司諫直集賢院韓琦左
藏庫使高繼嵩賀正旦既而繼嵩不行改命西染院
副使兼閤門通事舍人王從益

二年

遼重熙八年

八月刑部員外郎天章閣待制龐籍內殿

崇班閤門祇候杜贊賀國主生辰右正言直集賢院

判都磨勘司王拱辰西京左藏庫副使彭再問

遼史同作

思

賀正旦

十一月以兵部郎中知制誥聶冠卿爲

生辰使代龐籍

康定元年

遼重熙九年

七月遣刑部員外郎集賢校理同修

起居注郭稹

遼史作稹

供備庫副使夏防使契丹告用兵

西夏也

八月刑部員外郎知制誥蘇紳

遼史紳作伸

西

京左藏庫副使向傳範賀國母生辰右正言知制誥

吳育東頭供奉官閤門祇候馮載

遼史載作載

賀國主生

辰右正言梁適西染院副使張從一賀國母正旦太

常丞史館修撰富弼供備庫副使趙日宣賀國主正

旦

是年國母生辰元旦復遣使

慶歷元年

遼重熙十年

八月右正言知制誥劉沆崇儀副使

王整賀國母生辰禮部員外郎兼侍御史知雜事施

昌言左侍禁閤門祇候何九齡賀國主生辰權鹽鐵
判官工部郎中張沔內殿崇班侯宗亮賀國母正旦
權度支判官兵部員外郎王球內殿崇班閤門祇候
侍其濬賀國主正旦

二年

遼重熙十一年

四月遣右正言知制誥富弼西上閤門使

符惟忠報聘五月惟忠病卒以供備庫使恩州團練
使張茂實代之 七月弼茂實使旋復遣往議誓書

八月兵部員外郎兼侍御史知雜事程戡西上閤
門副使張得一賀國母生辰太常丞直集賢院張方
平東頭供奉官閤門祇候劉舜臣賀國主生辰兵部

員外郎集賢校理判三司開拆司楊偉禮賓副使王
仁旭賀國母正旦鹽鐵判官兵部員外郎方偕禮賓
副使王易賀國主正旦 十月遣右正言知制誥梁

適報聘

長編不見
副使未詳

三年

遼重熙
十二年

八月起居舍人知制誥孫抃洛苑副使馮

行已賀國母生辰鹽鐵副使工部郎中張盥之西頭
供奉官閣門祇候丁億賀國主生辰戶部員外郎兼
侍御史知雜事魚周詢問門通事舍人李惟賢賀國
母正旦工部郎中李鉞東頭供奉官閣門祇候趙牧
賀國主正旦仍詔惟賢權更名寶億爲意以避北諱

攷異

三

十月盈之除轉運以右正言集賢校理余靖爲國

主正旦使

四年

遼重熙十三年

八月以契丹來告伐夏遣右正言集賢校

理同修起居注余靖爲報聘使

亦不見副使

右正言祕閣

校理孫甫如京使夏防賀國母生辰太常少卿直史

館劉夔崇儻使楊宗讓賀國主生辰鹽鐵判官祠部

員外郎祕閣校理張瓌內園副使焦從約賀國母正

旦開封府推官監察御史劉湜東頭供奉官閤門祇

候李士勲賀國主正旦

五年

遼重熙十四年

正月復遣右正言知制誥史館修撰余靖

引進使恩州刺史王克基爲報聘使 八月右正言

知制誥楊察東上閤門使新州刺史王克忠賀國母

生辰戶部判官祠部郎中張堯佐西上閤門副使張

希一賀國主生辰度支判官祠部員外郎集賢校理

李昭遵供備庫副使閤門通事舍人李瑋賀國母正

旦監察御史包拯閤門通事舍人郭琮賀國主正旦

六年

遼重熙十五年

八月刑部員外郎知制誥王琪六宅使嘉

州刺史錢晦賀國母生辰右司諫知制誥錢明逸內

閣副使閤門通事舍人楊宗說賀國主生辰戶部判

官侍御史王平左班殿直閤門祇候王道恭賀國母

正旦金部郎中判三司勾院許宗壽內殿承制夏元
吉賀國主正旦

七年

遼重熙十六年

八月刑部員外郎知諫院吳鼎臣崇儀副

使柴貽慶賀國母生辰太常博士集賢校理同修起居注判度支勾院韓綜供備庫副使柳涉賀國主生辰戶部判官刑部郎中崔嶧內殿崇班閣門祇候侍其演賀國母正旦鹽鐵判官司勲員外郎劉立之內殿崇班李中佑賀國主正旦等以內殿承制閣門祇候夏佺代柴貽慶

八年

遼重熙十七年

八月太常丞直集賢院同修起居注李絢

如京使兼閤門通事舍人李珣賀國母生辰度支判
官太常博士集賢校理何中立內殿承制閤門祇候
鄭餘懿賀國主生辰工部郎中判度支勾院李仲偃
左侍禁閤門祇候孫世京賀國母正旦司勳郎中判
理欠憑由司李承德左侍禁閤門祇候康遵度賀國
主正旦既而絢辭不行改命祠部員外郎集賢校理
同修起居注胡宿

皇祐元年

遼重熙十八年

三月契丹使來告西征遣翰林學士

錢明逸西上閤門使榮州刺史向傳範爲報聘使

八月右正言知制誥李絢供備副使曹偕賀國母生

辰度支副使戶部員外郎梅堦內殿承制閣門祇候
李永寶賀國主生辰禮部員外郎兼侍御史知雜事
何郊內殿崇班閣門祇候柴貽範賀國母正旦著作
佐郎直集賢院同修起居注呂溱閣門通事舍人侯

宗亮

初命右班殿直閣門祇候魏公佐以御史言改命宗亮

賀國主正旦

二年

遼重熙十九年

三月契丹使來告捷遣翰林學士刑部郎

中知制誥趙鼎西上閣門使貴州團練使錢晦為報
聘使 八月工部郎中天章閣待制李東之西京左
藏庫使李綬賀國母生辰戶部員外郎兼御史知雜
事李兌供備庫副使李賡賀國主生辰鹽鐵判官司

封員外郎崇文院檢討孫瑜閣門通事舍人王道恭
賀國母正旦司勳員外郎判三司開拆司寇平內殿
崇班閣門祇候鄭餘慶賀國主正旦

三年

遼重熙二十年

八月翰林學士刑部郎中知制誥兼侍講

史館修撰曾公亮西京左藏庫使郭廷珍賀國母生
辰工部郎中知制誥史館修撰兼侍講王洙閣門通
事舍人李惟賢賀國主生辰戶部判官屯田郎中燕
度內殿崇班閣門祇候張克己賀國母正旦太常博
士直集賢院同修起居注王珪東頭供奉官閣門祇
候曹偓賀國主正旦

四年

遼重熙二十一年

八月戶部副使兵部郎中傅永文思副

使潘承嗣賀國母生辰禮部員外郎兼侍御史知雜事張擇行西染院副使兼閤門通事舍人夏偁賀國主生辰權鹽鐵判官都官員外郎蔣資內殿承制閤門祇候李中謹賀國母正旦太常博士直集賢院同修起居注判鹽鐵勾院韓絳東頭供奉官閤門祇候王易賀國主正旦

五年

遼重熙二十二年

八月度支副使工部郎中周沆左藏庫

副使錢昫賀國母生辰起居舍人知諫院韓贊供備庫副使彭再昇賀國主生辰戶部判官刑部員外郎

張去惑內殿崇班夏億賀國母正旦右正言直集賢院賈黯左侍禁閣門祇候王咸宣賀國主正旦

至和元年

遼重熙二十三年

八月起居舍人直集賢院同修起

居注吳奎禮賓副使郭逵賀國母生辰鹽鐵判官主客郎中宋選供備庫副使王士全賀國主生辰開封府判官殿中侍御史俞希孟閣門通事舍人夏仲賀國母正旦司封員外郎直龍圖閣兼天章閣侍講盧士宗西頭供奉官閣門祇候李惟賓賀國主生辰九月契丹使告與夏平遣三司使吏部侍郎王拱辰德州刺史李珣爲報聘使

二年

遼清寧元年

八月遼興宗殂遣翰林學士吏部郎中知

制誥史館修撰歐陽修四方館使果州團練使向傳

範爲賀登位使

初命賀國母生辰至是改

龍圖閣直學士兵部郎

中呂公弼西上閤門使英州刺史郭諮爲祭奠使鹽

鐵副使工部郎中李參內苑使兼閤門通事舍人夏

佺爲弔慰使右正言知制誥劉敞文思副使竇舜卿

賀國母生辰

初命賀國主生辰後改

戶部副使工部郎中張揆

西染院副使兼閤門通事舍人王道恭賀國主生辰

起居舍人直祕閣知諫院范鎮內殿承制閤門祇候

王光祖賀國母正旦權度支判官刑部員外郎李復

主染院副使兼閤門通事舍人柴貽範

初差內殿崇班閤門祇候

李克忠以御史言改差

賀國主正旦

嘉祐元年

遼清寧二年

八月刑部員外郎知制誥石揚休文

思使康州刺史沈惟恭賀國母生辰刑部員外郎直

史館同修起居注唐詢東頭供奉官閤門祇候王錯

賀國主生辰祠部員外郎判度支勾院集賢校理刁

約

初命侍御史范師道師道疾改差

供備庫副使劉孝孫賀國母正

旦右司諫馬遵內殿崇班閤門祇候陳永圖賀國主

正旦

二年

遼清寧三年

三月契丹遣使求御容以右諫議大夫權

御史中丞張昇單州防禦使劉永年爲回謝使 八月鹽鐵副使刑部員外郎郭申錫西京左藏庫副使王世延賀國母生辰右司諫呂景初西京左藏庫副使張利一賀國主生辰度支判官祠部郎中直祕閣王疇西染院使李瑊賀國母正旦殿中侍御史吳中復東頭供奉官閤門祇候宋孟孫賀國主正旦九月契丹再遣使求御容十月以翰林學士兼侍讀學士工部郎中知制誥史館修撰胡宿禮賓使李綬爲回謝使且許送御容

三年

遼清寧四年

正月以契丹國母殂遣侍御史朱處約宮

苑使潘若沖爲祭奠使度支判官兵部員外郎集賢
校理李仲師六宅副使雍規爲弔慰使 八月度支
副使右諫議大夫周湛閣門通事舍人王咸有賀國
母生辰開封府判官度支郎中李及之內殿崇班閣
門祇候王希甫賀國主生辰度支判官刑部郎中朱
壽隆禮賓使王知和賀國母正旦太常博士直集賢
院判戶部勾院祖無擇內殿承制閣門祇候王懷玉
賀國主正旦湛辭不行改命吏部員外郎楊旼旼又
辭乃命權鹽鐵副使工部郎中王鼎

四年

遼清寧五年

八月戶部員外郎天章閣待制唐介六宅

使梅州刺史桑宗望賀國母生辰侍御史丁詡左藏
庫副使劉建勲賀國主生辰開封府判官工部郎中
張中庸左藏庫副使馮文顯賀國母正旦太常博士
集賢校理判理欠憑由司沈邁供備副使高繼芳賀
國主正旦

五年

遼清寧六年

八月刑部郎中天章閣待制兼侍讀錢象

先西染院副使閤門通事舍人夏偉賀國母生辰侍
御史陳經東頭供奉官閤門祇候郭靄賀國主生辰
鹽鐵判官刑部郎中閤詢西京左藏庫副使劉禧賀
國母正旦度支判官祠部員外郎直集賢院王安石

西頭供奉官閣門祇候趙元中賀國主正旦安石辭

改命戶部判官兵部郎中祕閣校理王繹代之

六年

遼清寧七年

閏八月戶部郎中知制誥張瓌如京使朱

克明賀國母生辰度支判官刑部員外郎集賢校理

宋敏求西染院副使閣門通事舍人張山甫賀國主

生辰司封郎中楊佐供備庫副使李宗賀國母正旦

鹽鐵判官度支員外郎集賢校理王益柔內殿崇班

閣門祇候王淵賀國主正旦

七年

遼清寧八年

長編失載賀生辰正旦遣使事宋史亦無之

八年

遼清寧九年

三月仁宗崩四月遣引進副使王道恭爲

攻異

遼史八十三

告哀使

是年當有告卽位致遣留物謝弔慰及賀生辰正旦諸使長編皆失書宋紀止見韓贊一人

遣韓贊等爲告卽位使

起居舍人龔鼎臣充賀正旦辭不行當在此兩年間

治平元年

遼清寧十年

八月遣兵部員外郎呂誨等四人賀

國母生辰正旦刑部郎中章岷等四人賀國主生辰

正旦

長編失載據宋史英宗紀補下二年同

二年

遼咸雍元年

八月以工部郎中蔡抗等賀契丹生辰侍

御史趙鼎等賀契丹正旦

是年尚有起居舍人同知諫院傅堯俞侍御史趙瞻

見長編又賀正使王巖見遼史

二年

遼咸雍二年

八月以傅卞等賀遼生辰張師顏等賀遼

正旦

四年

遼咸雍三年

正月英宗崩遣馮行己告哀孫坦等告卽

位

遼史宋以卽位遣陳襄來報與宋紀異

九月遣孫思恭等報謝且賀

生辰正旦

長編自治平四年四月至熙寧三年三月皆闕今據宋史神宗紀得其大略耳又按

宋史蘇宋傳使契丹還道聞英宗晏駕契丹置宴仍

用樂撤之楊佐傳英宗升遐奉遺留物再往使卒於

道此二人亦治

平四年事也

熙寧元年

遼咸雍四年

八月遣張宗益等賀生辰正旦

二年

遼咸雍五年

九月遣孫固等賀生辰正旦

三年

遼咸雍六年

八月司勳郎中權戶部副使張景憲供備

庫副使劉昌祚賀國主生辰主客郎中戶部判官李

立之內殿承制劉鎮賀國主正旦天章閣待制孫永

供備庫使楊宗禮賀國母生辰度支員外郎直舍人院呂大防供備庫副使張述賀國母正旦大防辭不行改命祠部郎中開封府判官趙瞻

四年

遼咸雍七年

八月度支副使兵部郎中楚建中西京左

藏庫副使夏球賀國主生辰開封府判官太常博士

祕閣校理韓忠彥西染院副使閤門通事舍人李惟

賓賀國主正旦兵部員外郎知制誥陳繹皇城使忠

州團練使馬偁賀國母生辰度支判官司勳郎中王

誨文思使郭宗古賀國母正旦偁辭改命文思副使

梁交

五年

遼咸雍八年

八月司勳員外郎崔台符供備庫副使任

懷政

初命皇城副使日誼尋改差

賀國主生辰比部員外郎沈希

顏西作坊副使閣門通事舍人王文郁賀國主正旦

龍圖閣待制權御史中丞鄧紹皇城使曹偃賀國母

生辰權發遣鹽鐵副使度支郎中王克臣皇城副使

劉舜卿賀國母正旦綽克臣辭不行改命工部郎中

一集賢殿修撰沈起起居舍人直集賢院章衡

六年

遼咸雍九年

八月權戶部副使太常少卿賈昌衡左藏

庫使許咸吉賀國主生辰太子中允權監察御史襄

行蔡確供備庫使李諒賀國主正旦龍圖閣直學士

張燾西上閣門使種古賀國母生辰金部員外郎判將作監范子奇文思使夏元象賀國母正旦

七年

遼咸雍十年

三月遼遣使言代北疆界以兵部郎中天

章閣待制韓縝假龍圖閣直學士給事中爲報聘使

八月兵部郎中集賢殿修撰張芻皇城使忠州刺

史石鑑賀國主生辰屯田郎中權管勾三司開拆使

韓鐸內殿崇班王謹賀國主正旦知制誥章惇引進

使忠州團練使苗授賀國母生辰衛尉少卿宋昌言

西京左藏副使郭若虛賀國母正旦授辭疾改命東

上閣門使李評旣以惇察訪河北改命知制誥許將

八年

遼太康元年

三月遼再遣使來以右正言知制誥沈括

假翰林侍讀學士西上閤門使榮州刺史李評假四

方館使爲報聘使 八月工部郎中直龍圖閣判將

作監謝景溫文思使高遵路賀國主生辰太常丞集

賢校理直舍人院李定皇城使兼閤門通事舍人李

惟賓賀國主正旦太常丞集賢殿修撰侍御史知雜

事張琥皇城使姚麟賀國母生辰刑部員外郎集賢

校理同修起居注寶卞皇城使曹誦賀國母正旦既

而定不行改命祠部員外郎集賢校理孫洙麟遣母

喪改命東作坊使向緯

九年

遼大康二年

四月以契丹國母殂遣戶部副使度支郎

中王克臣西上閤門副使張山甫爲祭奠使太常丞

集賢校理蒲宗孟西上閤門副使王淵爲弔慰使

八月給事中程師孟皇城使嘉州團練使劉永壽賀

國主生辰度支員外郎祕閣校理安燾文思使高遵

治賀正旦

十年

遼大康三年

八月祕書監集賢院學士蘇頌西上閤門

使英州刺史姚麟賀國主生辰太常博士集賢校理

劉奉世內藏庫副使張世矩賀正旦

元豐元年

遼大康四年

八月知制誥兼侍講黃履皇城使雅

州刺史姚兕賀國主生辰太常博士周有孺西京左
藏庫副使楊從先賀正旦兕不行改命東上閤門使
榮州刺史狄諮

二年

遼太康五年

八月知制誥李清臣西上閤門使曹評賀

國主生辰主客郎中范子淵皇城使雅州刺史姚兕
賀正旦子淵辭免改命太常丞檢正中書戶房公事
畢仲衍

三年

遼太康六年

八月知制誥王存皇城使濟州防禦使劉

永保賀國主生辰太子中允集賢校理兼同修起居
注舒亶西京左藏庫副使王景仁賀正旦亶辭不行

攷異

遼史八十三

美

改命司門員外郎錢繼

四年

遼太康七年

長編失載遣使事宋史亦無之

五年

遼太康八年

八月承議郎寶文閣待制韓忠彥引進使

榮州團練使曹評賀國主生辰朝奉郎守禮部郎中

劉摯內殿承制張赴賀正旦

六年

遼太康九年

八月奉議郎試起居郎蔡京西上閤門使

狄詠賀國主生辰承議郎駕部郎中吳安持供備庫

使趙思明賀正旦

七年

遼太康十年

八月鴻臚卿陳睦西上閤門使曹諤賀國

主生辰奉議郎試右司員外郎范純粹文思副使侍

其璫賀正旦

八年

遼大安元年

三月神宗崩遣閣門通事舍人宋求

宋史作球

爲告哀使權改名淵四月遣承議郎試中書舍人王

震內殿承制審育爲遺留國信使

遼史王震作王真審育作甄祐承

議郎左司郎中滿中行左班殿直閣門祇候焦顏叔

爲告卽位使 八月刑部侍郎楊汲皇城使高州刺

史王澤朝請大夫戶部郎中韓宗道崇儀使嘉州刺

史帶御器械劉承緒賀國主生辰光祿卿呂嘉問左

藏庫使劉永淵朝請郎衛尉少卿陳侗西京左藏庫

使高遵治賀正旦

自是年始賀生辰正旦使皆四人前二人爲大皇太后使也及大皇

太后崩仍用二人九月承議郎龍圖閣直學士蔡卞客省使

沂州防禦使曹評爲太皇太后回謝使中書舍人范

百祿左藏庫副使兼閤門通事舍人高士毅爲皇帝

回謝使士敦辭改命左藏庫副使知冀州劉惟清

元祐元年

遼大安二年

八月給事中胡宗愈客省副使李琮

中書舍人蘇軾西京左藏庫副使兼閤門通事舍人

高士敦賀國主生辰朝奉郎直龍圖閣太僕少卿高

遵惠左藏庫使李嗣徽朝散大夫司勳郎中晁端彥

供備庫使楊安立賀正旦軾辭不行

不知更遣何人

二年

遼大安三年

八月戶部侍郎張頡皇城使楊永節中書

舍人曾肇皇城使向綽賀國主生辰太僕少卿王欽
臣西作坊使劉用賓工部郎中盛陶西頭供奉官閤
門祇候趙希魯賀正旦

三年

遼大安四年

八月龍圖閣直學士工部侍郎蔡延慶皇

城使海州防禦使劉永壽給事中顧臨文思副使段
綽賀國主生辰司農少卿向宗旦西京左藏庫使高
遵禮戶部郎中王同老內殿崇班閤門祇候賈祐賀
正旦

四年

遼大安五年

八月刑部侍郎趙君錫閤門通事舍人高

遵固翰林學士蘇轍閤門通事舍人朱伯材賀國主

生辰少府監韓正彥閣門祇候賈裕光祿卿范純禮
閣門祇候曹喚賀正旦純禮辭疾改命太府少卿陳
紘

五年

遼大安六年

八月龍圖閣待制樞密都承旨王巖叟引

進副使王舜封兵部侍郎范純禮莊宅使張佑賀國
主生辰吏部郎中蘇注供備庫使郭宗顏戶部郎中
劉昱西京左藏庫副使畢可濟賀正旦巖叟以親老
純禮以疾辭改命中書舍人鄭雍權工部侍郎馬默
默又以病辭改命天章閣待制吏部侍郎劉奉世奉
世又辭改命太僕卿林旦最後郭宗顏亦病改命兩

頭供奉官閤門陸孝立

六年

遼大安七年

八月中書舍人韓川皇城使康州刺史訾

虎刑部侍郎彭汝礪左藏庫使曹諮賀國主生辰吏
部郎中趙偁西京左藏庫使王鑒司農少卿程博文
左藏庫副使康曷賀正旦虎辭改命西上閤門副使
宋球川辭改命樞密都承旨劉安世安世又辭改命
中書舍人孫升升又辭以韓宗道代之汝礪辭以鴻
臚卿高遵惠代之宗道又辭乃復以命汝礪

七年

遼大安八年

八月權刑部侍郎王覲皇城使忠州刺史

張藻權兵部郎中杜純六宅使郝惟幾賀國主生辰

惟幾改名惟微避其國諱也太常少卿宇文昌齡供
備庫使曹讀殿中侍御史吳立禮內殿承制閣門祇
候向緯賀正旦純以日疾辭改命戶部侍郎范子奇
子奇辭足疾改命刑部侍郎豐稷

八年

遼大安九年

八月遣使賀遼生辰及正旦 九月太皇

太后崩遣使告哀又遣使致遺留物

長編自元祐八年六月至紹聖

四年三月皆闕故不得事使姓名

按呂陶傳以中書舍人奉使契丹在哲宗親政之
前當是此年事又蘇東坡有送王敏仲北使詩施
元之注敏仲名古以太常少卿奉使契丹亦當在

此年

紹聖元年

遼大安十年

正月遣祕書少監張舜民鄭介

不知何官

爲回謝弔祭使

八月遣使賀遼生辰正旦

二年

遼壽昌元年

八月遣使賀遼生辰正旦

三年

遼壽昌二年

八月遣使賀遼生辰正旦

按中書舍人朱服右司員外郎時彥奉使本傳不

載其年當在紹聖中也毗陵志余中於紹聖中使

遼不知何年又長編載元符二年蹇序辰奏取勘

客省帳茶酒有王曉例是曉亦從前奉使者也

四年

遼壽昌三年

八月禮部侍郎范鏗左藏庫使兼閤門通

事舍人向綽賀遼生辰太常少卿林邵供備庫使兼

閤門通事舍人張宗尚賀遼正旦

元符元年

遼壽昌四年

八月朝請郎權禮部尚書權侍讀蹇

序辰皇城使泰州團練使李嗣徽賀遼生辰序辰權
改名授之朝散郎度支郎中王詔西京左藏庫副使

曹矇賀遼正旦

二年

遼壽昌五年

四月以遼遣使爲夏國請和遣朝散郎中

書舍人郭知章東上閤門使文州刺史曹誘報聘誘

不行改命東作坊使兼閤門通事舍人宋深 八月

遣使賀遼生辰正旦

長編失載使臣姓名惟賀正副使供備庫副使賈希以李希道

身亡遣代
特見耳

二年遼壽昌六年

正月哲宗崩遣閤門通事舍人宋淵為告

哀使二月遣吳安憲朱孝孫為遺留國信使韓治曹

譜為告即位使七月遣陸佃李嗣徽為回謝使八月

遣董敦逸等賀遼生辰呂仲甫等賀遼正旦

自元符三年二

月以後長編俱闕據宋史本紀載其姓名生辰正旦二使本紀不書其副

建中靖國元年

遼乾統元年

正月遼道宗殂三月遣給事中

謝文瓘中書舍人上官均等為弔祭使黃寔為賀即

位使

此據宋紀遼史云宋遣王潛等來告祭未知孰是又自是年以後宋遼二紀皆不載賀正旦生

使辰

崇寧元年 遼乾統二年

二年 遼乾統三年

三年 遼乾統四年

四年 遼乾統五年 五月以遼遣使為夏求和遣翰林學士林

攄報聘八月遣禮部侍郎劉正夫使遼 此二條據宋史本紀遼紀

是年四月宋遣曾孝廣王翬報聘十二月宋遣林洙來議與夏約和與此不同林洙當即林攄之謬

五年 遼乾統六年 以與夏通好遣劉正符曹穆報聘 遼史載於是年

十月宋史無之疑劉正符即宋史之劉正夫也

大觀元年 遼乾統七年

二年 遼乾統八年

三年

遼乾統九年

四年

遼乾統十年

政和元年

遼天慶元年

九月遣端明殿學士鄭允中武康節

度使童貫為賀遼生辰使

中興小曆作二年蓋以九月奉命次年至遼也

二年

遼天慶二年

三年

遼天慶三年

四年

遼天慶四年

五年

遼天慶五年

六年

遼天慶六年

七年

遼天慶七年

春司封員外郎陶悅知霸州李邈賀遼正

旦見北盟會編繫年要錄蓋六年所遣也

重和元年遼天慶八年

宣和元年遼天慶九年遣書學正陳堯臣使遼

二年遼天慶十年遣國子司業權邦彥使遼其冬以右司員

外郎假太常少卿周武仲賀遼正旦見楊龜山集

三年遼保大元年

四年遼保大二年正月遼主棄中京出奔自是使命遂絕

按徽宗朝使遼者有工部侍郎王漢之右司員外

郎張叔夜右司員外郎陳過庭據會稽志通庭使遼在政和中衛

尉少卿假給事中韓肖胄賀生太府少卿盧法原

原缺

金史一

廿二史攷異八十四

錢大昕學

世紀

南人稱楊割太師又曰楊割追諡孝平皇帝號穆宗又
曰楊割號仁祖金代無號仁祖者穆宗諱盈歌諡孝
平盈近楊歌近割南北音訛遼人呼節度使爲太師
自景祖至太祖皆有是稱凡叢言松漠紀張棣金志
等書皆無足取 今叢言金志二書不傳惟洪皓松
漠紀聞所載九代世系頗與史合而譯字多異又世
所傳宇文懋昭大金國志云太祖楊割太師之長子

攷異

金史一

則與金史大相抵牾史所議爲無足取者也張棣書
徐氏北盟會編略引之

太祖紀

太祖應乾興運昭德定功仁明莊孝大聖武元皇帝

按天會三年上太祖諡曰武元皇帝皇統五年增諡
應乾興運昭德定功睿神莊孝仁明大聖武元皇帝
凡十八字紀首所書疑誤

天會三年三月上尊諡曰武元皇帝 禮志作大聖武
元皇帝

太宗紀

天會二年二月命徙移懶路都孛堇完顏忠于蘇瀕水
按地理志恤品路本率賓故地太宗天會二年以
耶懶路都孛堇所居地瘠遂遷於此海陵例罷萬戶
置節度使因名速頻路節度使又云耶懶文書作押
懶完顏忠傳云以耶懶地薄斥鹵遷其部於蘇濱水
然則移懶耶懶押懶一地也率賓恤品速頻蘇瀕蘇
濱一地也譯音本無定字史家亦不能盡一

八年詔曰婁室往者所向輒克今使專征陝西淹延未
定豈倦於兵而自愛耶關陝重地卿等其戮力焉
此語又見睿宗紀

海陵紀

他日海陵與辯語及廢立事曰若舉大事誰可立者辯

曰胙王常勝乎問其次曰鄧王子阿懶亮曰

當稱海陵此云

亮者史之駁文

阿懶屬疏安得立辯曰公豈有意乎海陵曰

果不得已捨我其誰於是旦夕相與密謀護衛將軍

特思疑之以告悼后曰辯等公餘每竊竊聚語竊疑

之后以告熙宗熙宗怒召辯謂曰爾與亮謀何事將

如我何杖之 此事又見胙王元及唐括辯傳彼傳

阿懶作阿楞楞懶聲相近也鄧王之父宗傑景宣同

母弟故辯以爲可立又案金史紀傳多冗蔓無法而

本紀重複尤甚姑卽海陵以下諸紀言之熙宗使小
底大興國賜亮生日悼后亦附賜禮物熙宗杖興國
追其賜物已見后妃及興國傳海陵與唐括辯語及
廢立事辯言胙王及鄧王子可立已見胙王及唐括
辯傳河南兵士孫進自稱皇弟按察大王已見胙王
及張通古傳貞元三年迎皇太后命左右持杖請痛
笞事已見后妃傳世宗居貞懿皇后喪方寢有紅光
照室及黃龍見已見五行志大定二年速頻軍士誣
完顏謀衍子斜奇寄書其子謀反訊之果誣事已見
謀衍傳七年謂敬嗣暉曰如卿不可謂無才所欠者

純寶耳已見嗣暉傳八年改旺國崖曰靜寧山曷里
許東川曰金蓮川已見地理志又謂宰臣曰海陵起
居注所書多不實孟浩言古帝王不自觀史已見浩
傳大磐私取良弓爲護衛所告已見磐傳十一年謂
丞相韓企先當與功臣圖像已見企先傳十二年召
皇太子及趙王上殿言京嘗圖逆此條別有辯證又以德州
防禦使文貴產賜其兄子皆已見宗望傳十年夏臣
任得敬裔其主李仁孝上表請中分其國上不許并
卻其貢物已見西夏傳十三年御審思殿命歌女直
詞并誠皇太子諸王已見樂志二十五年宴上京宗

室上自歌本曲道祖宗勦業艱難亦見樂志二十七年謂宰臣曰卿等老矣殊無可以自代者乎云云已見張汝霖傳章宗明昌二年吳王永成隋王永升聞國喪奔赴失期罰俸漢王永中以疾失期諭使回已見永中傳敕漢遼唐宋等名不得封臣下令有司議改已見百官志四年遣完顏匡使宋權更名弼以避朱諱已見匡傳衛紹王大安三年徒單鎰請徙桓昌撫百姓入內地又請置行省于東京已見鎰傳宣宗貞祐四年內族承立進所獲馬駝事已見承立傳興定元年宋使朝辭上言宋人何故犯我高琪請伐之

不聽許古請遣使與宋議和宰臣以爲徒示微弱無足取已見高琪傳五年完顏賽不遣使獻捷監察御史劾其縱將士鹵掠詔勿問已見賽不傳元光二年與宰臣論人有才而心不正者不足貴已見高汝礪傳哀宗正大元年有男子服麻衣望承天門且哭且笑羣臣請置重典詔杖而遣之已見五行志天興元年議以曹王出質密國公璘請代行不聽已見璘傳而本紀又一一書之至如宋高麗夏之通使已立交聘表詳言之矣而本紀每年書某國使朝賀遣某某使某國賀正旦生辰不亦贅乎粘割韓奴魏全死節

已立忠義傳表章之矣而紀復詳述之亦複而無法
又如大定二十一年移刺余里也之十子以母死更
代廬墓當載於孝友傳泰和四年祭前代帝王十七
君當載於禮志今皆入本紀中雖非重複於體例亦
未當也

世宗紀

大定二年四月立楚王允迪爲皇太子 允迪後改名
允恭卽顯宗也大金國志謂大定三年立長子越王
允升爲皇太子次子允猷封晉王十九年晉王允猷
宴於南涼觀三鼓方散及晨晉王已殞胷口皆傷詔

大興府捕賊下獄鞠問實太子使之允升出奔至和龍上遣明威將軍完顏宇追之至東謨與允升戰允升衆散爲人所殺諡允猷爲元悼太子二十年立昇王允恭爲皇太子又云世宗有子七人長曰太子允升次曰昇王允恭次曰晉王允猷第四第五失其名次曰鄭王允蹈次曰衛王允濟今以史攷之世宗子十人顯宗母弟有趙王越王早卒未賜名此外無名允猷者若夔王允升大定十一年始封王歷事四朝年齒最高至宣宗初尚存初無立爲太子謀叛見殺之事如志所書皆不足信

十二年十月壬子召皇太子及趙王永中上殿上顧謂
宰臣曰京嘗圖逆今不除之恐爲後患又曰天下大
器歸於有德海陵失道朕乃得之但務修德餘何足
慮遂釋之丙辰以德州防禦使文貲產賜其兄之子
咬住且諭其母文之罪汝等皆當連坐念宋王有大
功於國故置不問仍以家產賜汝子 此二事俱見
宗望傳彼傳以不除恐爲後患爲宰臣所言故世宗
有但務修德餘何足慮之語紀皆以爲世宗之言誤
也咬住乃文兄齊之子此是諭齊妻之詞

十三年五月禁女直人毋得譯爲漢姓 按章宗紀明

昌二年十一月制諸女直人不得以姓氏譯爲漢字
相去纔十有八年而復降此制蓋習俗之難返甚矣
國語解所載完顏曰王女奚烈曰郎之類皆大定明
昌間所譯也

章宗紀

明昌四年八月辛亥國史院進世宗實錄上服袍帶御
仁政殿降座立受之 按泰和三年十月庚申又書
尚書左丞完顏匡等進世宗實錄上降座立受之疑
一事重出也

五年十月參知政事馬琪自行省回具奏河防利害語

載琪傳中 按琪傳不載此語當云見河渠志

承安二年八月左宣徽使膏尚書右丞 按膏字不見
於字書必是傳寫之譌予見曲阜孔廟石刻承安四
年三月奉定軍節度使兼兗州觀察使完顏曾祭文
後有孔元措跋云相國完顏公自尚書右丞出鎮沈
郡與此紀三年十二月尚書右丞膏罷年月相合然
則膏卽膏之譌說文膏用也从盲从自讀若庸石刻
作膏隸體小變耳

泰和二年三月蔡王從彝母充等太師卒詔有司定葬
禮葬儀事載從彝傳 充等太師當是充華太妃之

諱從葬傳亦未載此事唯張曄傳云霍王從葬母早
歿溫妃石抹氏養之明昌六年溫妃薨上問從葬喪
服曄奏請未葬以前服白布衣絹巾既葬用素服終
制朝會從吉上從其奏或卽指此事然曄所議者慈
母服制非葬禮且明昌與泰和相隔六七年未可合
爲一事也從葬本充華田氏所生曄傳旣云早卒何
以其卒轉在溫妃之後尤爲矛盾

從葬傳亦云母早卒

衛紹王紀

戶部尚書武都拾遺田庭芳等三十人請降爲王侯

按執中傳云衆相視莫敢言獨文學田廷芳奮然曰

先朝素無失德尊號在禮不當削於是從之者禮部
張敬甫諫議張信甫戶部武文伯龐才卿石抹晉卿
等二十四人文伯卽武都字也彼云不當削此云降
爲王侯則與張行簡諸議無以異矣

宣宗紀

興定元年十月壬午從宜移刺買奴言 按自壬午以
後當是十一月事史失書月

四年益都賊張林來攻

是時有兩張林皆在益都

見蒙

古制田
孫傳

此攻滄州者本益都府卒以功授治中興定

三年逐轉運使田琢而據其地史所稱益都張林也

是年八月李全犯東平府監軍王庭玉敗之禽其僞
安化軍節度使張林此則益都桃林寨總領號張大
刀者也

哀宗紀

正大五年完顏訥申改侍講學士充國信使 訥申卽
奴申也

末帝退保子城聞帝崩率諸臣入哭諡曰哀宗 按紀
傳皆稱哀宗獨食貨百官二志稱義宗大金國志亦
稱義宗又云宿州有僭位者諡曰昭故官僑於宋者
諡曰閔或謂哀不足以盡諡天下士夫咸以義宗諡

取左氏國君死社稷之義也完顏婁室傳蔡凶問至發喪設祭諡哀宗曰昭宗此息州行省所諡大金志以爲宿州者誤也歸潛志稱哀宗爲末帝與史又異歷志

元祐時尚書右丞蘇頌與昭文館校理沈括奉敕詳定渾儀法要按沈括上渾儀議在熙寧七年不與頌同時

地理志上

建五京置十四總管府是爲十九路按大金國志云二十路以此志校之多臨潢一路彼志所言皆據大

定以前之制也大定後罷臨潢路入北京路故云十九

其閒散府九節鎮三十六防禦郡二十二刺史郡七十

三軍十有六縣六百三十二後復盡升軍爲州按

金初沿宋舊制每路有州有軍至大定二十二年始

盡升軍爲州然則志所舉節鎮防刺之數亦大定以

前之州郡故與每路總計之數不能盡合然志所計

節鎮防禦郡刺史郡之數實多舛誤今據大金國志

云京都六留守司五處上等二處中都大興府中等

四處北京大定府東京遼陽府總管府十四處上等

七處

平陽真定益都東平京兆太原大名

中等四處

河開慶陽臨洮鳳翔

下等三

處

延安咸平臨潢

散府八處上等二處

河濟南

中等三處

歸德河南

平下等三處

廣寧興中彰德

節鎮三十九處上等十處

絳定懷柔

密滄路汾冀邢

中等十處

代同雄保充邪涇朔奉聖平

下等十九處

許徐府義

豐嵐鄧鄭鞏隆應雲內蓋宗懿錦秦衛桓

防禦二十一處上等七處

博德洛棣

孟亳

中等七處

清蔡華濟鄭泗宿

下等七處

陝華潁河秦陳隴

刺史

七十五處上等十四處

解景沃濤澤石潞原汝隰蘭會德順

中等二

十五處

沃薊深滿曹鄆登嵩單唐鄭磁遼沁海濱維恩濟鄆開并坊乾寧

下等三十

六處

易通順霸遂利信安慶安肅澄復宏韓睢貴德壽建莫懿威武滑管宣德懷商瓠肅古忻洮淨

撫寧邊東勝

十六軍竝改作州上等三州

泰安滕寧海

中等三

州

平定
鈞宮

下等十州

岢嵐寧化保德興緩德
保安懷鎮戎積石來遠

總京府州

軍計之正合百七十九之數是足以訂史文之誤矣
史所云散府九者并臨潢數之若定州之爲中山府
奉聖州之爲德興府皆明昌以後所升故不在此數
也上京路之肇州西京路之撫州南京路之蔡州後
皆升節鎮北京又增置全興兩州皆爲節鎮又西京
路之昌州南京路之裕息二州皆明昌以後所置刺
史州若并增置州言之京府州當爲百八十有四也
大安以後疆宇日蹙所升置州郡史家不入計數之
內故亦存而不論

是以金之京府州凡百七十九縣加於舊五十一城寨堡關百二十二鎮四百八十八此與大金國志之文正同但彼所述者大定之制此兼及章宗一朝故以諸路所計郡縣數并之總不相合

上京路領節鎮四防禦一按上京路所領三州隆州

節鎮也肇州防禦也

承安三年升節鎮

信州刺郡也又有蒲

與路恤品路胡里改路皆設節度使而不立州縣故不在節鎮之數今與隆州並列爲四於例旣未盡一又失書刺郡一尤疏漏矣

東京路刺郡四四當作五

婆速府路 元史作婆娑府

北京路領節鎮七刺郡三 當云節鎮八刺郡二

西京路刺郡八 八當作七

中都路刺郡九 九當作十

薊州縣五舊又有永濟縣大定二十七年以永濟務置
未詳何年廢 按元至元七年孫慶瑜撰豐閏縣記
云金大定閒改永濟務爲縣大安初避東海郡侯諱
更名曰豐閏史不知豐閏卽永濟之改名而分而爲
二乃以豐閏爲秦和閒置又謂永濟已廢而未得其
年皆誤之甚也

豐潤泰和閒置 按衛紹王以泰和八年十一月卽位
豐潤更名當卽在其年史云泰和閒者亦未大失但
改名而非初置耳朱彝尊據清類天文分野書云洪
武元年改閒爲潤今金元史雕本閒旁均著水非也
地理志中

南京路領節鎮三防禦八刺史郡八 按本路節鎮唯
鄧許二州泰和中升蔡州爲節鎮史旣云節鎮三則
防禦止於七矣刺郡本七泰和中增置裕息二州則
當云刺史郡九也

歸德府散中宣武軍 軍下當有節度二字

濟南府

濟陽

案于欽齊乘云金初劉豫割章邱之

標竿鎮及臨邑封圻之半置濟陽縣大定六年

當是泰和

八年或大安初

避金主允濟諱改曰清陽允濟遇弒復舊名

衛紹王事迹史失其傳以濟陽永濟之例推之則濟

南府名亦當改易也

禮志四

以粘哥宗翰幹里不宗望

志書配享諸臣如斜也朶

阿思魁忠之類皆本名與改名兼舉粘哥卽宗翰幹

里不卽宗望也粘沒喝又稱粘罕此又稱粘哥幹里

不亦作幹离不又作幹魯補此篇又作訛魯補兀朮

亦作幹出或作幹啜譯字之無定如此

十八年黜辭不失 按金初有兩辭不失一爲宗人辭
不失一爲金源郡王習失亦作辭不失皆預配享今
據明昌所定兩人皆在東廊之位則此云黜者疑誤
也

皇伯太師遼忠烈王宗幹幹魯 幹魯當作幹本

開府儀同三司金源郡毅武王習失 卽昭祖之孫習
不失也本傳諡忠毅

開府儀同三司金源郡明毅王完顏忠阿思魁 本傳
失書諡亦不云贈開府儀同三司

特進宗人幹里古莊翼 傳作幹魯古

特進完顏辭不失 卽完顏石土門之子習失也本傳

諡威敏

開府儀同三司金源郡剛烈王幹魯 卽韓國公劾者
之子本傳失書其諡又不云贈開府儀同三司又傳
云皇統五年追封鄭國王而此稱金源郡王者蓋正
隆中宗室屬疏者例降爲公大定三年又例加金源
郡王諸傳或書或不書爾

皇叔祖元帥左都監魯莊明王閭母 本傳諡壯襄

開府儀同三司充國英敏公劉彥宗 本傳失書配享

廟廷事

右丞相金源郡武定王紇石烈志寧 按百官志紇石烈姓例封廣平郡志寧傳亦云封廣平郡王此稱金源郡疑誤

禮部尚書張行簡言近奉詔從世宗十六拜之禮臣與太常參定儀注竊有疑焉 按此事見張行信傳行簡乃行信之兄志誤

禮志六

班首降階復位 此下南北監本竝脫一葉太宗諸子傳亦脫一葉予嘗見元槧本鈔補之

禮志七

嶽鎮海瀆其封爵竝仍唐宋之舊明昌閒從沂山道士
楊道全請封沂山爲東安王吳山爲成德王霍山爲
應靈王會稽山爲永興王醫巫閭山爲廣寧王淮爲
長源王江爲會源王河爲顯聖靈源王濟爲清源王
今以宋史禮志攷之江河淮濟四瀆之名則宋康
定元年封號也吳山則宋元豐八年封號也沂山醫
巫閭山霍山則宋政和三年封號也會稽山宋時封
永興公政和進封永濟王今仍永興之名而加王號
亦非特創也惟江瀆宋爲廣源王此作會源或亦轉

寫之謬要皆仍宋舊制何待楊道士之請邪然章宗
紀明昌六年十二月明有加上五鎮四瀆王爵之文
豈別有加上之字而史失之歟予家藏金時石刻有
濟瀆靈應記文稱顯祐清源王碑立于正大五年此
四字王爵或卽明昌所上或後來所加惜乎史家語
焉而未詳也又按大金集禮載大定四年奏四瀆王
號與此同唯東鎮安東公南鎮永興公中鎮應聖公
西鎮成德公北鎮廣寧公未加王號

禮志八

武成王廟配祀黜王猛慕容恪等二十餘人而增金臣

遼王賽也等 按阿高合憲之次子名賽也史不立傳恐不在武成配享之列此賽也疑卽遼王斜也斜與賽聲亦相近

禮志十

奉冊皇太后儀天德二年正月詔有司擇日奉冊唐殷國妃岐國太妃仍別建宮名 按海陵本紀是月尊嫡母徒單氏及母大氏皆爲皇太后志所云唐殷國妃者徒單氏岐國太妃者大氏也海陵父宗幹史稱封梁宋國王熙宗紀本傳並同徒單氏當云梁宋國妃而云唐殷國妃所未詳也海陵之封岐王本紀亦闕而不

書惟后妃傳云海陵后徒單氏為岐國妃

百官志一

凡封王大國號二十曰恆

舊為

邵

舊為

汴

舊為

鎬

舊為

并

舊為

益

舊為

彭

舊為

趙

舊為

郢

舊為

魯

舊為

豫

絳

舊為

兗

舊為

夔

舊為

宛

舊為

曹

舊為

次

舊為

涇

舊為

鄭

舊為

衛

舊為

潞

舊為

幽

舊為

岐

舊為

代

舊為

澤

豐

舊為

畢

舊為

鄆

舊為

霍

舊為

蔡

舊為

瀛

舊為

沂

舊為

十

舊為

濮

舊為

遂

舊為

道

舊為

定

舊為

景

舊為

申

舊為

萊

舊為

宗

舊為

以

舊為

鄆

舊為

杞

舊為

向

舊為

管

舊為

士

舊為

民

舊為

須

舊為

知

舊為

蕭

舊為

莘

舊為

芮

舊為

云舊者則大定格也攷大金集禮云天眷元年定到

國封等第大國二十遼燕梁宋秦晉漢齊魏趙越許

楚魯冀豫

御名
宗名雍也

充陳曹次國三十蜀隋鄭衛吳

韓潞幽瀋岐代虞徐滕薛紀原邢翼豐畢鄆鄆霍蔡

瀛沂榮英溫小國三十漢濟道定景申崇宿息莒鄴

郃舒滿郕宗郎譚應向郇密胙任戴鞏葛蕭莘芮皇

統五年十月二十九日奏定大國從上添唐殷商周

爲二十四餘仍舊是大定以前已有封爵三等國名

大定格於大國去燕殷商周魏而增吳蜀又改雍爲

唐次國改岐爲鄂杞爲紀又增荆壽小國改應爲杞

與舊稍有異同志止舉大定格而不及天眷皇統之制未免漏落矣明昌二年以漢遼唐宋之類皆昔有天下之號不宜封臣下故皆改之則虞之改澤亦當與同時志於澤下不云舊爲虞亦漏也世宗初封葛王章宗初封原王故臣下不敢居其名宗爲睿宗名景爲章宗嫌名濟爲衛紹王名郇爲宣宗嫌名故亦改之

金史一終